

Immanuel Kant sco furmader clandestin da noss temp

DA JOHANN ULRICH SCHLEGEL

■ **Enfin ch'in tschert pensar e cumportament s'ha stabilisà e consolidà tar ils umans, passan savens lungus spazis da temp. I dat indizis per quai, co che nosa civilisaziun actuala dal vest vegn influenzada pir ussa fermamain dad ideas e ponderaziuns ch'èn vegnidas furmadas e proclamadas decisivamain avant radund 200 onns dal pli grond filosof tudestg fin ussa, dad Immanuel Kant.** Kant – ses 200avel di da la mort croda sin ils 12 da favrer 2004 – cumpara sco center, gea sco il sulegl da tut ils pensaders tudestgs. Els auters, er sch'els portan numns uschè renumads sco Georg Wilhelm Friedrich Hegel, Arthur Schopenhauer, Karl Marx u Friedrich Nietzsche, els tuts cumparan per uschè dir mo sco ils planets che circundeschan il pensar d'in Kant. Nua ch'igl è però blera glisch, na ston ins betg tschertgar dalunsch la sumbriva. Uschia è cumparida gia baud era la critica envers Kant. Questa critica sa mussa oz pli actuala che mai.



200 onns perioda iniziala?

Quel di d'enviern fraid e cun blera naiv, ils 12 da favrer 1804, era mort Immanuel Kant en sia citad natala. Ed uss retschaveva el quai che anc nagin filosof famus n'aveva mai survegni: In funeral a cust dal stadi, e quai da character extraordinari, al qual s'han participads ils pli auts dignitaris dal stadi. Sch'ìls notabels dal stadi sa preschentan dentant, alura n'è er il pievel betg dalunsch. Tut la populaziun s'ha participada al funeral.

Immanuel Kant è naschì ils 22 d'avrigl 1724 a Königsberg sco quart uffant d'in maister per la fabricaziun da tschintas, ed ils Kants vivevan en relaziuns modestas, bunamain paupras. Ses geniturs al avevan, uschia Kant sez, «da in'educaziun exemplara en gistadad, onestadad morala e disciplina, senza relaschar facultad, dentant era senza debits – in'educaziun che, contemplada dal puntg da vista moral, n'avev insumma betg pudì esser megla». Kant ha studegià a l'università da Königsberg l'emprim teologia, alura filosofia. Kant è daventà suenter ses studi da la filosofia e suenter in temp d'actività sco scolast tar nobels da la champagna en vischinanza da la citad, l'emprim docent per fisica e matematica a l'università. Pir 1770 ha el survegni la professura per filosofia en il senn pli stretg. Questa professura per filosofia ha Kant tegnì fin a sia mort cun 80 onns. Schebain ch'el na po betg gist vegnir characterisà sco ascet, ha el manà sco nunmaridà tuttina ina vita fitg disciplinada ed

ordvart lavurusa. Tut sia vita n'ha el mai bandunà Königsberg, cun excepziun da curtas scappadas en ils conturns pli stretgs da la citad. Sia maniera da viver era uschè precisa ch'ìls da Königsberg drizzavan, sco ch'ì vegn pretendì, lur uras cura ch'el passava speravi faschond sia spassegiada quotidiana. Kant era fitg pitschen, betg fitg robust, el mantegneva però sia sanadad cun ina maniera da viver reglada. El valeva sco interlocutor brigliant e gentil. Ses di da lavur cumenzava exact la damaun a las tschintg, e la saira a las diesch gieva el a letg. In temp da recreaziun impurtant era per el la maisa da mezdi. Cura ch'ì gieva economicamain gia meglier cun el, envidava el adina giasts, e quai mai damain che trais e mai dapli che nov, per che, sco ch'el aveva la disa da s'exprimer, il dumber dals envidads na saja mai damain che quel da las grazias e mai dapli che quel da las musas. Politicamain è el en il senn da l'illuminessem in liberal, ed i pudess esser evident ch'el ha beventà perquai la Revoluziun franzosa.

La critica fundamentala da Kant

Diesch onns suenter ch'el aveva surpiplià la professura a Königsberg, è Kant entrà 1781 en la publicità mundiala cun in dals pli gronds cudeschs da tuts temps, cun la «Kritik der reinen Vernunft». Alura è suandadas duas ovras consecutivas, 1788 sia «Kritik der praktischen Vernunft» e 1790 la «Kritik der Urteilskraft». Tranteren, 1785, è cumparì ultra da questas trais ordvart grondas «criticas» in tom ordvart pitschen: la «Grundlegung zur Metaphysik der Sitten». Questa scrittira ha fin oz anc adina ina grond'influenza.

Blers, sche betg la gronda part dals pensaders e scienziads avant Kant consideravan sco evident che noss savair uman vegnia finalmain cunfinà da quai ch'exista. Consequentamain savain nus scuvrir ed eruir adina dapli, fin ch'ì na dat a la fin finala nagut auter pli da chattar u da scuvrir.

Kant è in via cumplettamain autra. El ha constatà che noss savair è sutta-mess ad ina limitaziun anc en tut in'otra maniera. Tenor quella savain nus ve-sair cun noss eglis, udir cun nossas ureglias, pensar cun noss tscharvè. Nus savain savurar, gustar e palpar. Nus savain percepir e reagir cun l'entir apparat da noss senns. Quai ch'è dentant dador noss apparat corporal, na savain nus logicamain betg percepir. Sche nus plaz-zain per exempel in magnetofon en in conturn definì, alura intermediéscha quel in'impressiun definida da quest conturn. Sche nus faschain fotografias en il medem conturn, survegnin nus tut in'otra impressiun dal medem lieu. Kant concluda che quai che nus savain pertschaiver è magari segir pli limità che quai ch'exista vairamain en la realità. Ditg curtamain, quai che nus percepin è pli pover che l'entira realità. Correspundentamain è quai in'error fundamentala da metter a pèr l'imaginaziun d'ina chaussa cun la chaussa sezza. I sa tracta qua dad in'error, sco che nus la ve-sain tar uffants u pievels primitivs. L'error è quasi uschè gronda sco sche nus tegnessan la curva da temperatura al letg d'in pazient per ses purtret. Perquai che nus stuain sfurzadamain partir da quai ch'ì dat anc chausses ordaifer noss mund d'experienceschas e da noss intellect, dis-

curra Kant da quest champ dal mund sco l'uschenumnà mund transcendent. Ins numna quest mund era metafisica. La metafisica è quel mund che surpasa il mund a nus generalmain accessibel u che al transcendescha. Quai ans faschess forsà fadia d'enleger quests paratgs da Kant, sch'els n'ans fissan betg gia enconuschents en in auter context da la vita. Las bleras religiuns mundialas cuntegnan la cretta ch'ìl mund dals objects materials en spazi e temp na signifitgeschia betg l'entira realità. Ellas menziunan ch'ì dat anc tut in auter nivel da la realità. Kant mussa ch'ì dat, argumentà sulettamain raziunal, era en il sector betg religius chausses che nus na savain mai chapir, ch'existan però tuttina.

Uss èsi fitg impurtant da menziunar, tge che Kant excluoda en sia filosofia e qua en il champ spezial da la metafisica. Sche nus avain chapì che nus na pudain betg vegnir a savair tut, alura na pudain nus era betg eruir, sche quest auter u en quest connex la metafisica exista insumma. Da quai resulta che nus na pudain betg savair insatge ni da l'existenza da Dieu ni da l'existenza da las olmas immortals. Ins na sa betg stimar avunda questa critica da Kant. Ella daventa d'eminente impurtanza e muntada per las epocas suandantas. La cretta en Dieu schloppa cun in fracass che mida radicalmain tut l'istorgia universal, e la dat ina fatscha cumplettamain nova. Questa nova istorgia universal secularisada vegn dominada enfin oz da noss ambient cultural occidental.

Kant ha destrui las uschenumnadas cumprovas da Dieu e cun quai ina gronda part da las estructuras d'ideas filosoficas ch'èran vegnidas construidas durant tschientaners e millennis e che avevan pussibilità cuminzanzas internaziunalas stabilas, damai che cumprovadas, en bleras excellentas autas culturas. Dapi Kant è quasi tut ils pensaders serius da l'idea che l'existenza da Dieu na saja betg da cumprovar. L'existenza da Dieu n'è tenor Kant però insumma era betg da refutar. Quest segund aspect dentant na resta betg decisiv per il svilup spiertal. Ordvart accentuà sa profitescha l'ateissem, schebain anc temelitg, latent, però sco la forza decisiva. Malgrà quai èsi impurtant che la decisiun da betg crair è en quest mument era puspè ed unicamain ina cretta. Uschia na daventa Kant betg mo l'accumplider da l'illuminessem, dal temp raziunal, el daventa era ses surventschider. Kant ha adina temì da vegnir malenletg. Sia tema era giustifitgada. Sche sia filosofia fiss restada dal rest en in ravugl pitschen

da scienziads, alura n'avev ella betg cuntanschì ina forza explosiva uschè gronda. La filosofia da Kant però penetrescha en la vasta publicità. E quella è adina pli accessibla a la sensaziun che a l'aspect quiet dals scienziads. A questa sensaziun èn dentant succumbids finalmain tuts, analfabets gist uschia sco scienziads. I vegn mess en moviment ina lavina. Ed igl è la sensaziun, il cumplettamain nov, quel refugi en la libertad enivranta, aventurusa, che sdrappa cun il fracass creschint la lavina da las spundas muntagnardas. 100 onns pli tard tematisescha Friedrich Nietzsche en ina dramatica incumparabla l'eveniment en emprims resultats imposants. En il terz cudesch da si'ovra «Die fröhliche Wissenschaft» vestgescha Nietzsche sia diagnosa da la desditga dals umans da Dieu anc en il vestg d'ina parabra. El fa cumparair la figura d'in «uman balurd», ch'è arrivà sin la piazza da martgà casualmain tranter la gliued che na crai uss gist betg pli en Dieu. Quest nar naiv sbragia: «Jau tschertg Dieu!» Ed ils umans dattan ina risada divertenta: «Ma è el ì a perder? È el sa sperdi sco in uffant? Ha el tema da nus? È el ì en bartga? Emigrà?» – uschia sbragian e sbarbuttan els tuts in tranter l'auter. «L'uman balurd» però siglia entamez tranter els ed als perfora seriusischem cun sias egliadas. «Nua è Dieu», cloma el. «Jau as vi dir quai!» Las fronts da la naivtad vegnan midadas. «Nus al avain assassinà - vus e jau! Nus tuts essan ses assassins! Ma co avain nus fatg quai? Co essan nus stads buns da baiver or la mar? Tgi ans ha dà la spungia per sfruschar davent tut l'orizont? Tge avain nus fatg, cur che nus avain schlià il sulegl da la terra?» Pli tard en il Zarathustra arriva Nietzsche tar la diagnosa sociologica nunsentimentala: «Ina gia era il fraud vi da Dieu il pli grond fraud, ma Dieu è mort!» Ed ussa racolta quest grond successur da Kant il fritg da la planta tissientada per tut l'avegnir, sch'el cuntinescha cun in tun quasi lapidar, ma en ina direzza insuperada: «Cun quai eran morts era ils frauds.» Nietzsche conceda dentant diplomaticamain, gea quasi precautamain: «L'eveniment sez è bler memia grond, memia distant, memia ordvart il dun da registraziun da blers, per ch'era mo la nova possia gia vegnir numnada sco arrivada.» Cun quai eran morts era ils frauds: Cun questa etichetta pudess ins pelvair entitular commensuradamain plirs chapitels da l'istorgia dal ventgavel tschientaner. La furmaziun clandestina dals fundaments «kantics» po senz'auter daventar inquietanta.